

REVISTA SITUASAUN FEVREIRU 2015

ASUNTU NE'EBÉ PRESIZA TAU ATENSAUN

- ▶ Hanesan fulan Janeiru, membru F-FDTL uza forsa maka'as ba responde problema privadu
- ▶ Juventude no eis grupu arte marsiais nafatin sai alvu ba konflitu
- ▶ Ema kbiit laek hetan asaltu too mate husi ema deskoñesidu

MEMBRU F-FDTL UZA FORSA MAKA'AS BA RESPONDE PROBLEMA PRIVADU

Belun nia monitorizasaun iha Sistema Atensaun no Responde sedu (AtReS), iha fulan Janeiru, rekolla dadus insidente 4 liga ba membru F-FDTL uza forsa maka'as ba responde problema privadu. Iha fulan ne'e, AtReS rekolla dadus hamutuk 2 liga ho forsa F-FDTL uza violénsia hodi rezolve odi pesoál nian. Insidente ida mak akontese hanesan tuir mai.

Iha loron 3 Fevreuru dadeer, iha Aldeia Sosoher, Suku Riheu, Postu Administrativa Ermera, Munisipiu Ermera, akontese membru F-FDTL baku estudante ida husi Nino Conis Santana Gleno Ermera. Bainhira estudante sira halo hela limpeza jerál iha kapitál Gleno, hodi halo preparasaun ba simu vizita Cruz Joven no Nossa Senhora Peregrina, membru F-FDTL ida hatais sivil uza motorizada no halai maka'as liu husi fatin ne'e. Tanba estudante barak los, estudante ida hakilar, "maun halai neineik". Membru F-FDTL ne'e la simu, hodi fila hikas ba Postu F-FDTL nian, bolu fali nia kolega membru F-FDTL na'in rua mai asalta joven mane estudante ne'e to'o ran sai husi inus no ibun. Profesór eskola no estudante sira la simu reasaun husi membru F-FDTL hirak ne'e no hato'ó lamentasaun ba RTTL, hodi bolu atensaun públiku no instituisaun relevante. Insidente hanesan mós akontese iha Suku Serelau, Munisipiu Lautein. Joven goza membru F-FDTL depois membru F-FDTL mai tuku kedas joven ne'e. Joven sira seluk mai hodi ajuda nia maluk, membru F-FDTL resposta ho tiru ameasa.

Total insidente Fulan Fevreuru 2015	
Distritu	Insidente
Aileu	3
Ainaru	5
Baukau	6
Bobonaru	3
Covalima	2
Dili	14
Ermera	3
Lautein	4
Likisá	4
Manatuto	1
Manufahi	3
Oekusi	5
Vikeké	9
Total	62

JOVENTUDE NO EIS ARTE MARSIAIS NAFATIN SAI ALVU KONFLITU

Iha gráfiku "se mak hahú halo violénsia" hatudu katak joven mak aas liu hotu ho total 18 insidente. Iha gráfiku "saida mak abut konflitu" mós nafatin hatudu joven sei nafatin iha número aas liu hotu ho total insidente 14. Insidente akontese entre joven dala barak liga ho eis arte marsiais, hemu tua lanu, iha festa laran, atividade desportu no goza malu. Iha insidente tuir mai bele hatudu mós karakterístika insidente ida liga ho juventude.

Iha Aldeia Tautalo, Suku Hatukesi, Postu Administrativa Likisá, loron 4 Fevreuru madrugada, Polísia kaer joven mane na'in 8 husi eis membru arte marsiais KORK, hala'o hela treinu. Joven mane na'in 8 hala'o hela treinu iha tempo kalan no Polísia ba halo atusaun ba sira ne'ebé husi eis membru arte marsiais KORK, tanba grupu ne'e governu bandu, taka ona atu la hala'o sira nia atividade tuir rezolusaun tolu hanesan rezolusaun numeru 13/2011 hodi taka provizóriu atividade arte marsiais hotu maibé konflitu entre arte marsiais mosu nafatin entaun governu hasai fali rezolusaun número 24/2012 hodi prolonga. Rezolusaun governu número 16/2013 mak foin hakotu no halakon arte marsiais 3 hanesan PSHT, IKS no KORK. Razaun balun mós tanba polísia identifika duni joven mane na'in 1 husi na'in 8 tuir treinu ne'e involve halo krime (taa ema) iha tempu pasadu. Ho ida ne'e, katuas ida foti katana hodi ameasa polísia entaun polísia resposta ho tiru ameasa dala sanulu resin, halo comunidade pániku. Iha tempu ne'e, kedas katuas ne'ebé ameasa fali polísia ne'e hetan kedas baku ho besi kanu husi Xefe Juventude Suku Hatukesi. Insidente ne'e, hetan kedas aproximasaun husi Xefe Aldeia, Xefe Juventude no membru PNTL balun husi Likisá hodi kaer joven na'in 8 inklui katuas ida, hatama ba sela preventiva no hein prosesu legal. Insidente hanesan mós akontese iha Comoro Terra Santa, Eis Grupú Arte marsiais asaltu malu rezulta uma ida no loja ida rahun tanba hetan tuda.






EMA KBIIT LAEK HETAN ASALTU TOO MATE TANBA ASUNTU DESKONESIDU

Insidente asaltu husi ema deskoñesidu rekolla hamutuk 4 iha fulan Fevreuru, hare husi gráfiku "se mak hahú halo violénsia". Razaun ba asaltu ne'e mós susar atu deteta tanba laiha evidénsia forte hodi halo analiza. Insidente sériu ida mak hanesan tuir mai ne'e.

Iha loron 9 Fevreuru oras 01.00 meiodia, iha Aldeia Raimea, Suku Kairui, Postu Administrativa Laleia, Munisipiu Manatutu. Kronolojia insidente: la'en ho fen no fen ne'e isin rua fulan 4 la'o ba mota sorin kuaze kilo metru 4, hodi taa akar atu fó han fahi, iha oras tuku 01.00 meiodia. Depois too kalan, ninia oan sira hein maibé inan-aman la mosu mai, entaun ninia oan no família ba buka too tuku 10.00 kalan maibé la hetan. Dadeer tuku

06.00, Xefe Aldeia no Xefe Suku mobiliza comunidade hodi ba buka no hakfodak hetan sira na'in rua nia mate isin iha mota ninin. La'en nia tilun karuk ko'a kotu no fen nia tilun los ko'a kotu. La'en nia kakorok mamar, deskonfia ema silu. Fen ho la'en nia ulun hetan kanek barak. Matebian husik hela oan na'in 7, oan primeiru feto idade 19 anó. Xefe Aldeia afirma katak, "durante ne'e sira nunka iha problema, sira ema simples, uma hela fatin mós iha kondisaun la di'ak. Ami la komprende ema ne'e nia motivasaun saida, halakon sira nia vida". Mate isin agora iha hela Ospital Nasionál Dili hodi halo autópsia.


Insidente atu hanesan mós akontese iha Suku Leolima, Postu Administrativa Hato-Udo, Munisipiu Ainaru. Joven ida toba hela iha tempu kalan, derrepente de'it ema deskoñesidu taka tiha ahi depois tau tudik iha joven mane ne'e nia kakorok. Tanba mane ne'e halo reasaun lalais entaun ema deskoñesidu ne'e halai lakon tiha. Maske joven mane hetan asaltu ne'e la mate maibé ninia kakorok hetan kanek todan.




Saida Mak Ema Hahu Violensia Nia Jeneru




Se Mak Vitima Nia Jeneru




Hun no Abut Konflitu



Se Mak Responde



Impaktu



ATIVIDADE PREVENSAUN NO RESPONDE BA KONFLITU

Atividade Ne'ebé Hala'ó Husi Ekipa Atensaun no Responde Sedu (AtReS)

- ▶ Fasilita enkontru trimestral hodi fahe resultadus monitorizasaun liga ho situasaun no konflitu iha komidade ba Munisípiu 5 (Baukau, Ainaru, Dili, Vikeké no Oekusi). Rede Prevenasaun no Responde Konflitu (RPRK) realiza sira nia enkontru regular hodi tetu, insidente violénsia saida mak domina liu iha fulan 4 liu ba no asaun saida mak RPRK bele foti, hodi prevene no responde insidente violénsia ne'ebé mosu iha sira nia Postu Administrativa.
- ▶ Iha loron 2 Fevreiru, AtReS hasai ALERTA daruak, liga ba insidente violénsia iha Suku Saelari. Alerta ne'e foka liu impaktu ba komidade, husi insidente ne'e no husi Koamandu Operasaun Konjunta (KOK) nafatin fó hanoin ba governu no konsidera realidade balun iha komidade husi asaun hirak ne'e.
- ▶ Iha loron 17 Fevreiru, AtReS publika ona relatoriu "Política Subsídium Idozus no Konflitu". Relatóriu ne'e ofrese mos rekomendasaun ba governu hodi oinsa bele

redus konflitu husi sistema pagamentu idozus ne'ebé tinan-tinan hamosu tensaun konflitu.

- ▶ Fasilita Treinamentu Transformasaun Konflitu Modul IV ba monitor sira. Treinamentu ne'e realiza durante loron tolu komesa dia 18-20 iha Sentru Formasaun UNIO Diocese Dili, Ailoklaran. Partisipante hamutuk 18 monitor (feto 9, mane 9). Iha modul IV, monitor aprende liu kona-ba oinsá hakerek no verifika dadus insidente, oinsá bele sai mediator no oinsa bele maneja sira nia hirus (anger management).



- ▶ AtReS suporta atividade planu asaun ba RPRK 2 hanesan RPRK Postu Administrativa Likisá no Postu Administrativa Tutuala.
 - RPRK Postu Administrativa Likisá ho Comisaun Reguladora Arte Marsiais (CRAM) Likisá realiza sosializasaun lei arte marsiais no lei baze do edukasaun ba grupu joventude, inan-aman no profesor/a sira. Realiza iha dia 25 no 27 Fevreiro, loron rua.
 - RPRK Postu Administrativa Tutuala realiza diálogu no seremonia kultural hodi rezolve konflitu seriu entre suku 2 (Mehara no Tutuala), Komesa dia 18 to'o 20 Fevreiro, durante loron 3. Serimónia ne'e hetan partisipasaun husi Sekretáriu Estadu Juventude no Desportu no Ministériu Interior liu husi Diretór Nasionál Diresaun Prevensaun Conflitu Comunitaria (DNPCC).

Atividade Ne'ebé Halao Husi Ekipa Mediasaun no Rezolusaun ba Disputa (MRD)

- ▶ Iha fulan Fevreiro, bazeia ba MRD ia esperiéncia servisu iha terrenu, ekipa ne'e dezenvolve sira nia modul mediasaun ne'ebé durante ne'e baibain uza.
- ▶ Enkontru entre medidór husi governu no medidór husi sociedade sivil iha edifisiu Belun iha loron 6 Fevreiro 2015. Partisipa husi parte governu mak hanesan: PDHJ, MSS-Departamentu Harii Pas no Koesaun Sosiál no Ministériu Interior-DNPCC, Ministériu Justisa-DNTP. Partisipa husi sociedade sivil, rede ba rai mak hanesan: Belun, Fongtil no HAK. Objetivu jerál husi enkontru nee mak atu fahe informasaun liga ho mediasaun problema rai no loke diskusaun atu harii rede medidór iha nivel nasional hodi rezolve konflitu komunitaria.
- ▶ Medidór DNPCC hamutuk ho ekipa MRD Belun fasilita mediasaun disputa rai iha Comoro. Rai na'in uluk entrega rai nee ba nia kolega, depois kolega nee harii tiha uma ne'ebá. Too ikus rai na'in nia alin feto ezije hodi entrega rai ne'e ba nia. Tanba

keixa tama ba DNPCC nee liga ba disputa rai entaun DNPCC mai Belun hodi hamutuk fasilita mediasaun. Mediasaun realiza iha loron 10 Fevreiro no konkorda katak rai na'in sei prepara uma foun ida, iha fatin seluk hodi rai na'in nia kolega nee bele hela ba, depois mak rai ho uma nee entrega fila fali ba rai na'in nia alin feto.

- ▶ Fasilita mediasaun disputa rai eransa iha Postu Administrativa Manatutu iha loron 27 Fevreiro. Bei-oan sira hadau rai natar ne'ebé uluk avó sira husik hela ba sira. Mediasaun nee tama ona etapa terseiru tanba liga liu ba istória rai ne'e. Parte katuas lia na'in sira mak bele Klarifika no hatene loloos rai nee entrega ba se iha tempu uluk.

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violéncia no tendensia husi koleksaun dadus monitorizasaun liu husi Sistema Atensaun no Responde Sedu (AtReS) Timor-Leste durante Fevreiro 2015. Belun esforsu atu fahé informasaun ne'ebé up-to-date no serteza ho dadus atual. Hanoin katak, situasaun bele hetan mudansa ho lalais husi kontribuisaun dame ita hotu nian. Ami agrade se no simu informasaun seluk ne'ebé bele klarifika ka update dadus ne'ebé ami iha liuhusi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevensaun Konflitu: laurensius.belun@gmail.com